

prendre cela comme une histoire vulgaire et profane, i'ay bien voulu condescendre à vostre volonté, comme à celui à qui je ne puis ny dois refuser aucune chose, à la charge et condition que vous me gratifierez en une priere que ie vous fais, à sçavoir qu'après avoir sceu et couru une fois ceste genealogie, vous ne la communiquerez à personne ny mesme à mes enfans propres, ains en ferez un present à Vulcan, à fin que nul d'eux se puisse servir de ces vanitez et fumées en ce monde tant vitieux et corrompu.

DISCOURS DES HOMMES ILLUSTRÉS DE LA RACE DES COMTES  
DE VINTEMILLE, PALEOLOGUES ET LASCARIS.

I. La cité de Vintemille, assise sur un promontoire ou cap de mer en la coste Ligustique, que l'on nomme la rive de Gennes, est une tresnoble et illustre cité, qui se nommoit iadis, du temps des Romains, Entemelion, autrement Inganni Entimelii, de plus ancienne fondation que la ville de Rome, selon que Strabon et Ptoloméé et mesme Tite Live le temoignent. Elle fut vaincüe et reduicte sous la puissance des Romains, du temps de la troisiésme guerre punique, par Lucius Æmilius Paulus, proconsul, lorsqu'il fit la guerre et subjugua toute la province appellée Ligurie, laquelle fut ainsi appellée d'un roy nommé Lygistus, fils de Phaeton, qui premier regna en ceste region, et s'estand depuis la riviere Maira pres de Nice, separant l'Italie des Gaules, jusques au Var, fleuve pres de Pise, au port de Lyverne, et contient plus de deux cent miles de long. Ceste cité a tousiours esté à l'obeissance des Romains jusques au temps de Valentinian, empereur, lorsque les villes et provinces se sont peu à peu distraictes du ioug de l'empire romain, et